



MEMORIA XUSTIFICATIVA DO CONVENIO DE COLABORACIÓN ENTRE A CONSELLERÍA DE PRESIDENCIA, XUSTIZA E DEPORTES E A UNIÓN DE FEDERACIÓNS DEPORTIVAS GALEGAS PARA O DESENVOLVEMENTO DE ACTUACIÓNS DE FORMACIÓN, ASESORAMENTO E APOIO ÁS FEDERACIÓNS DEPORTIVAS GALEGAS

(1) Esta Consellería de *Presidencia, Xustiza e Deportes* é o órgano da Administración autonómica que ten atribuído o exercicio das competencias en materia de deportes, conforme ao establecido no Decreto 136/2024, do 20 de maio, polo que se establece a súa estrutura orgánica.

No mencionado ámbito material, entre as competencias da Administración autonómica recóllense, entre outras, as de formular a política deportiva autonómica, definir e fixar as directrices e programas de fomento e desenvolvemento do deporte galego nos seus diferentes niveis, así como planificar e organizar o sistema deportivo de Galicia, realizar as convocatorias de ámbito autonómico para o outorgamento de premios ou distincións, así como para a concesión de subvencións e outras actuacións de fomento do deporte.

(2) Antecedentes:

A Lei 3/2012, do 2 de abril, do deporte de Galicia, regula no seu artigo 51.1 as federacións deportivas galegas, configurándose estas como entidades privadas sen ánimo de lucro con personalidade xurídica propia e plena capacidade de obrar, cuxo ámbito de actuación se estende ao territorio da Comunidade Autónoma de Galicia.

O artigo 5, no seu apartado j), outórgalle á Administración da Comunidade Autónoma de Galicia a competencia de coordinar e tutelar ás federacións deportivas galegas no exercicio das funcións públicas que teñen delegadas, e elo sen menoscabo da súa actividade privada.

A Unión de Federacións Deportivas Galegas (UFEDEGA) constitúese como unha Asociación sen ánimo de lucro, de carácter privado, ao abeiro do artigo 22 da Constitución Española e da Lei Orgánica 1/2022, do 22 de marzo, reguladora do dereito de asociación. A UFEDEGA ten como fins, entre outros, o de promover, defender e representar o deporte federado galego; defender os intereses comúns das Federacións Deportivas Galegas asociadas; establecer as estruturas administrativas ou de asistencia técnica ás Federacións Deportivas de Galicia, e





exercer de canle entre elas; asesorar e colaborar coas institucións públicas e privadas de todo tipo, no referente ao deporte federado galego en xeral, e o seu desenvolvemento e mellora; propoñer cantas iniciativas sexan necesarias para unha mellor política deportiva galega.

Para cumprimento destes fins, a UFEDEGA realiza, entre outras, actividades de asesoramento, apoio técnico e formación ás Federacións Deportivas Galegas; colaboración coas distintas administracións públicas competentes en materia deportiva; xuntanzas, cursos, simposios, foros, debates e encontros en relación co deporte.

(3) **Finalidade** Para os efectos sinalados, tense previsto formalizar coa *Unión de Federacións Deportivas Galegas (UFEDEGA)* o instrumento convencional arriba referido por un período de vixencia que abrangue dende a súa sinatura, o 13 de maio ata o 31 de decembro de 2025.

(4) O convenio ten por **obxecto** establecer para o ano 2025 as bases de colaboración entre a Consellería de Presidencia, Xustiza e Deportes e a UFEDEGA para contribuír ao financiamento dos gastos ocasionados con motivo da realización dos programas de formación, asesoramento e apoio ás Federacións Deportivas Galegas que leva a cabo a UFEDEGA.

As actuacións que se desenvolverán en base a este Convenio de Colaboración son as seguintes:

- Asistencia xurídico deportiva.
- Espazo virtual para a celebración de reunións das diferentes Federacións deportivas Galegas.
- Acordos coas distintas federacións deportivas galegas e institucións para a cesión de espazos físicos para a celebración de xuntas directivas, asembleas e reunións.
- Actuacións de comunicación e promoción do deporte federado.
- Asesoramento e formación non regulada.
- Formación regulada.





(5) O instrumento convencional que se pretende asinar **fundaméntase** na competencia exclusiva da Comunidade Autónoma na materia da promoción do deporte (artigo 27.22 do Estatuto de Autonomía de Galicia), correspondéndolle á Consellería de Presidencia, Xustiza e Deportes, a través da Secretaría Xeral para o Deporte as competencias de elaboración, proposta e execución da política do goberno galego en materia de deportes, conforme ao establecido no Decreto 136/2024, do 20 de maio, polo que se establece a estrutura orgánica da Consellería de Presidencia, Xustiza e Deportes e na consideración de UFEDEGA como entidade que dispón do coñecemento necesario sobre as estruturas e necesidades das Federacións Deportivas, e se constitúe na canle oficialmente recoñecida en representación de 57 das 59 Federacións Deportivas galegas inscritas no Rexistro de entidades deportivas de Galicia.

Asemade, segundo o disposto no artigo 51 da Lei do Deporte de Galicia, nas federacións intégranse os clubs, seccións deportivas, deportistas, técnicos, xuíces, árbitros e outros colectivos interesados estatutariamente establecidos, co obxectivo de promover, practicar e, en xeral, contribuír ao desenvolvemento dunha mesma modalidade ou especialidade deportiva. Deste xeito, a UFEDEGA, na súa condición de asociación das federacións deportivas de Galicia, constitúe a única canle oficialmente recoñecida con relación aos clubs deportivos galegos das distintas modalidades deportivas.

É evidente pois, o interese público na sinatura do convenio, de acordo co artigo 26.2 da Lei 9/2007, do 13 de xullo, de subvencións de Galicia, porque contribuirá a:

- unha mellor especialización e formación das federacións deportivas galegas co obxectivo de garantir o cumprimento efectivo das funcións públicas que teñen atribuídas.
- promoción do deporte en toda a sociedade.
- promoción do deporte de competición e de alto nivel en colaboración coas federacións deportivas.





Doutra banda, cómpre salientar que existe unha identidade entre os obxectivos da UFEDEGA e os que constitúen o obxecto do presente convenio.

Por todo o exposto, considérase de gran interese a colaboración das partes asinantes, non sendo posible promover a concorrência pública resultando, polo tanto, de aplicación o artigo 19.4 da Lei 9/2007, do 13 de xullo, de subvencións de Galicia.

(6) A Consellería de Presidencia, Xustiza e Deportes **financiará** as accións do presente convenio, ata un máximo de CORENTA MIL EUROS (40.000 €) con cargo á partida orzamentaria 05.02.441A.481.0 dos orzamentos xerais da Comunidade Autónoma de Galicia para o ano 2025.

(7) Polo exposto, considérase xustificada a utilización do instrumento do convenio para articular as actuacións de referencia, quedando o dito convenio fóra do ámbito de aplicación da Lei 9/2017, de 8 de novembro, de contratos do sector público, con independencia de que, ao abeiro do previsto no artigo 4 da dita norma, lle sexan de aplicación os principios desta lei para resolver as dúbidas e lagoas que se poidan presentar.

En Santiago de Compostela,

O secretario xeral para o Deporte

José Ramón Lete Lasa (*asinado dixitalmente*)

